

Futuro carera politico di Booshi Wever ta depende di testnan medico

ORANJESTAD – Lider di Fraccion di partido MEP no tin pensa di retira ainda for di politica. Asina e ta desmenti e rumornan persistente cu e lo retira pa motibo di su salud durante e programa Papia Cla cu Tito Lacle ayera na Telearuba. E parlamentario a muestra cu enberdad e salud por tin un impacto riba su carera y cu esei lo por ta un factor pa cual e mester retira. Pero aworaki esei no ta e caso y no ta spera cu esei mester bira un hecho tampoco.

E parlamentario recientemente a bolbe di Corsow unda cu e la pasa como 7 siman di tratamento kimo, pa asina combati su cancer di prostat. Awor cu



e ta bek, e ta trahando atrobe, pero mesora a cuminsa surgi e rumor cu e lo ta retirando di politica pasobra su salud lo no ta permitie traha mas. “Aki 2 pa 3 siman mi ta haya resultado di e testnan” Wever a sigura e matutino aki ayera

y a muestra cu despues di e resultado ei, e lo evalua e situacion. E la muestra mesora cu si e testnan sali negativo pe, esta cu e celnan canceroso a bolbe aparece, e lo tin cu evalua pa retira enberdad. Pero aworaki e no tin pensa

di haci esaki.

E tin fe cu tur cos lo sali bon y cu e por sigui cu su carera como politico activo te ora cu e tin cu baha cu pensioen, e añanan cu e falta. “Mi por bisa cu mi ta sintimi bon y cu mi ta trahando atrobe” Wever a sigui bisa.

Tabata dos aña pasa cu e mandatario a wordo confronta cu e hecho cu e tabatin cancer di prostaat. Mesora a cuminsa cu tratamento pa bringa esaki cual a bai sumamente exitoso y cu a logra deshaci di tur e celnan canceroso den su curpa. Tur hende, incluyendo Wever, a kere cu tabata un etapa di su bida cu a pasa. Pero lamentablemente mas tempran e anja aki a bin

e noticia lamentabel cu un biaha mas celnan canceroso a keda detecta den su curpa, na su prostat cu a pone cu e mester a bolbe desvia di su carera y cuminsa cu tratamento pa bringa e celnan aki.

Despues di 7 siman di a permanece na Corsow, e ta bek na Aruba trahando en espera di e resultado di su testnan y pa despues tuma un decision dependiendo di esaki. Bon Dia Aruba ta desea Wever forza y cu enberdad e celnan aki no bolbe nunca mas. Y esaki ta e deseo di e matutino aki pa cualkier persona cu ta pasando den e tratamiento aki cu sigur no ta algo bon pa ningun hende.